


CELEBRACIÓN DO DOMINGO EN OS COTOS

16-17 de xuño do 2018

XI DO TEMPO ORDINARIO



OS COTOS COA IGUALDADE VERDADEIRA DAS PERSOAS,
CO POBO DE SIRIA QUE SOFRE UNHA GUERRA INJUSTA,
COS REFUXIADOS E MARXINADOS DA SOCIEDADE
E COA NATUREZA MALTRATADA POLOS INCENDIOS



1.- ENCONTRO DA COMUNIDADE

(tod@s de pé)

@ monitor/a está na sé

CANTO n° 3 🎵 *Unha xuntanza de ... (estrofa 1)*

SAÚDO DE BENVIDA

Celebrante

Benvidos sexamos todos a este encontro. Reunímonos coma comunidade no nome do Pai, e do Fillo e do Espírito Santo.

Hoxe, non hai tempo para nada, todo son presas, todo ten que ser inmediato. O que hoxe é noticia, en breve deixa de selo. Xa non se fala de Paramos, xa parece que non hai mortos en Palestina, xa parece que non hai pobos desaparecidos en Guatemala, xa parece que so son refuxiados os que agora chegan a Valencia. Só vale o inmediato.

En cambio Xesús propón un xeito diferente. No evanxeo de hoxe ponnos coma exemplo o medrar dunha planta. Porque unha planta medra dun xeito constante, de día e de noite. Porque medra cunha finalidade clara, a de dar froito. Porque medra sen medo de empezar sendo nada máis que unha pequena semente pero que se sabe chamada no tempo a dar froitos abondosos.

Este é o camiño da nosa vida: sen medos, coa constancia do día a día, e coa mirada posta, non no inmediato, senón no dar froitos a longo prazo.

ACTO PENITENCIAL

Celebrante A vida de Xesús demostranos que vale a pena compartir con todas as persoas dende a actitude da constancia, dende o día a día, dende a valentía de querer dar froitos abondosos. Así queremos pedir perdón e renovar con Xesús os nosos compromisos pois así foi como el viviu

Monitor/a

- Comprometémonos a vivir saboreando as pequenas cousas do día a día?

SI COMPROMETÉMONOS

- Comprometémonos a mirar a realidade sen medo a ser pequenas sementes dun mundo mellor?

SI COMPROMETÉMONOS

- Comprometémonos a poñer todo o que estea nas nosas mans para algún día dar froitos abundantes?

SI COMPROMETÉMONOS

ORACIÓN PROPIA DO DIA

Celebrante Rematamos a primeira parte da celebración presentando no silencio o que rebule no noso interior. Para os nosos tempos igual xa non é noticia pero queremos seguir achegándonos á parroquia rota de Paramos, queremos seguir sendo xentes de paz porque non aceptamos as violencias que se viven en Palestina, e queremos seguir doándonos cos pobos de Guatemala que o ven todo feito cinsas.

(silenzo)

Deus, Noso Pai, Ti es a fortaleza dos que esperan en ti. Atende con bondade as nosas súplicas e dános o auxilio da túa graza, pois sen ti nada podemos.

Así fieis á túa palabra poderemos agradarche cos froitos da nosa vida.

Así o fixo Xesús, e por El, pedímoscho a Ti, que vives e reinas por sempre eternamente. Amén.

2.- PROCLAMACIÓN DA PALABRA DE DEUS

(sentad@s) a palabra de Deus proclámase dende o ambón

Celebrante *Escoitar con presas non é escoitar. A Palabra de Deus é vida cando a acollemos, cando deixamos que sexa en nós semente, cando con ela medramos sen medo deixando que co tempo cheguen os froitos. Por iso as palabras que agora escoitamos non son froitos, son só semente plantada na nosa vida.*

No Leccionario II – B páxina 201

LECTURA

LECTURA DO LIBRO DO PROFETA EZEQUIEL

nº 41 🎵 **Quen nos vai separar de Ti?**

SALMO

(en pé) *No Leccionario II – B páxina 203*

EVANXEO

PROCLAMACIÓN DO EVANXEO DE MARCOS

(sentad@s) gardamos uns instantes de silencio para acoller a palabra no corazón

PROFESIÓN DA FE

Celebrante Neste encontro parroquial no que renovamos os nosos compromisos con Xesús, queremos coma EL, medrar paseniño, día a día, coma sementes que queren dar froitos abundantes.

Dicimos

♪ *Creo, Señor, pero aumenta a miña fe*

Monitor/a

Credes en Deus Pai,
creador do ceo e máis da terra,
que pon nas nosas mans
o facer do mundo un fogar acolledor ?

Creo, Señor, pero aumenta a miña fe

Credes en Xesús,
o seu fillo benquerido,
que viviu nesta terra dando comezo
ao Reino feito evanxeo?

Creo, Señor, pero aumenta a miña fe

Credes no Espírito Santo,
na Igrexa, na comunión dos santos,
no perdón e na vida eterna
con todos os preferidos de Deus?

Creo, Señor, pero aumenta a miña fe

(en pé) ORACIÓN UNIVERSAL

Celebrante Oremos a Deus Pai, e como comunidade poñamos nas súas mans os nosos mellores desexos para esta sociedade na que vivimos.

Oremos dicindo *Pai, axúdanos a medrar*

Monitor/a

1. Pai bo, pedimos hoxe pola nosa sociedade, para que entre todos a vaíamos construindo máis xusta e pacífica cada día. Oremos

2. Pai, pedimos tamén polas persoas que facemos a igrexa, para que saibamos aportar as nosas pequenas sementes. Oremos

3. Pai, pedimos por todos os crentes, para que teñamos unha personalidade optimista, e saibamos valorar o moito bo que hai entre nós mesmos. Oremos

4. Pai cheo de tenrura, axúdanos ser cariñosos e preocupados con todas as persoas que máis difícil o teñen. Oremos

5. Pai, pedimos por todas as persoas que teñen a responsabilidade de gobernar, para que vexan sempre polos máis necesitados. Oremos

Celebrante Deus Pai, escoita as nosas pregarías, e énchenos do alento que levaba a Xesús a sementar evanxeo. Ti que vives e reinas por sempre eternamente. Amén.

3.- OS SIGNOS DA COMUÑÓN CON DEUS E COA COMUNIDADE

NOSO PAI

Celebrante Fiándonos dos consellos de Xesús, querendo ser testemuñas da súa vida imos rezar, sen presas, sabendo que a oración non é para froitos inmediatos é para expresar confianza.

NOSO PAI ...

SIGNO DA PAZ

Celebrante As nosas mans tendidas uns para os outros expresan a nosa vontade de ser coherentes nos feitos; con corazón de irmáns en Cristo, e facendo noso o seu camiño de vida imos ir de sementeira. Coas nosas mans sementamos paz

CANTO 🎵 *nº 36 Fagamos a paz irmáns*

COMUÑÓN

Celebrante: A mesa da Fe é anticipo da mesa do Reino; participar nela é comprometer a vida en construír un mundo que sexa todo el mesa compartida, un mundo que non lle vire as costas a ninguén, un mundo de sementes chamado a dar froitos. Ditosos todos nós, convidados a este pan do Señor.

CANTO *nº43* 🎵 *Non vou so*
 ou nº58 🎵 *Acharte presente*

4.- AVISOS E DESPEDIDA

ORACIÓN FINAL

Celebrante Oramos a Ti, Señor, porque seguros da túa bondade dásnos no evanxeo un exemplo e unha garantía da nosa salvación. Fai que todo o que hoxe celebramos nos leve vivir na constancia do día a día, sen medos e dando pequenos froitos en todo o que dicimos e facemos. Pedímoscho a Ti que vives e reinas con nós por sempre eternamente. Amén

Con Xesús, cremos que vale a pena facer evanxeo sementándoo para que mañá se faga froito.

Con Xesús quixemos escoitar a Deus e quixemos facer crible que non hai que ter medo a ser semente dun mundo máis acolledor.

Con Xesús quixemos lembrarnos dos veciños da parroquia de Paramos, e quixemos tamén lembrar o que está sucedendo en Guatemala co volcán, e en Palestina cos enfrontamentos violentos. Así nos facemos cribles, e así queremos facer nesta semana.

Que o Señor nos bendiga, † nos garde de todo mal e nos leve á vida eterna. Amén

Avísase das misas (ver folla do mes) e contamos que o domingo día 1 de xullo Sebas (seminarista de Fornelos) vai dar un paso importante no camiño cara o sacerdocio. Vai ser ordenado diácono. Na nosa oración destes días pidámoslle a Deus que o axude a ser semente e froito na nosa igrexa. Será na catedral de Tui ás 7.